



Ramazansko pismo

شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ الْهُدَىٰ وَالْفُرْقَانِ

”U mjesecu ramazanu počelo je objavljivanje Kur’ana, koji je putokaz ljudima i jasan dokaz Pravog puta i razlikovanja dobra od zla.” (el-Bekare, 185).

Mjesec ramazan za muslimane predstavlja poseban period u toku godine. Muslimani, a među njima i Bošnjaci s radošću dočekuju ramazan nazivajući ga ”velikim” ili ”dragim” gostom želeći istaknuti važnost i svetost ovog mjeseca. Ramazan je poput proljeća, proljeća koje oživljava i budi prirodu, ramazan oživljava ljudska srca sofrom duhovnih aktivnosti koje čovjeka čine duhovno sitim.

Temeljna potreba svih ljudi je društvo i zajednica. Čovjek je biće društvenosti koje jedino u društvu živi i ispunjava svrhu svog postojanja. Ramazan je mjesec zajednice i zajedništva. Zajedno postimo i zajedno osjećamo glad, zajedno se iftarimo i zajedno osjećamo slast hrane i pića, zajedno razgovaramo i zajedno rješavamo probleme. Najviše smo u ramazanu fizički, ali i duhovno blizu jedni drugima. Sveti mjesec unosi lijepe promjene u naš život, ali i u našu okolinu, ljude s kojima živimo i radimo, muslimane i nemuslimane. Muhammed a.s. kaže: ”Post je štit, pa kada neko od vas posti neka ne govori bestidne riječi i neka se ne dere, a ako ga neko opsuje ili napadne, neka kaže: Ja postim!”. Poslanikove riječi: ... a ako ga neko opsuje ili napadne, neka kaže: Ja postim!”, najbolje opisuju sklad koji ramazan nosi sa sobom. Čak ni pod cijenu uvrede, čovjeku nije dozvoljeno uzvratiti na isti način, kako ne bi narušio mir mjeseca ramazana.

Ramazan nas uči da promjena, a pogotovo duhovna počiva na čvrstom djelovanju, na osjećajima koji prate djela. Suzdržavanje od jela, pića i tjelesnih užitaka, u periodu od zore do zalaska sunca, uobličava ramazanski post, vrijeme fizičkog pročišćenja tijela, ali i duše, posebno jezika i misli. Pet dnevnih namaza kao pet duhovnih postaja za pronalak mira i odah od svakodnevnice, posebno su naglašeni u mjesecu ramazanu, uz dobrovoljni teravih-namaz, večernji unutarnji obračun sa samim sobom i pripremu za predstojeći dan. Učenje i slušanje riječi Časnog Kur’ana tradicionalno poznato kao ”mukabela”, podsjeća čovjeka na razmišljanje o posljednjem Božijem iskoraku čovječanstvu – Kur’anu. Mukabela je tradicionalno aktivnost koja se u toku ramazana održava u džamijama, kao i mnoge druge ramazanske aktivnosti, naglašavajući značaj, ali i vrijednost zajednice i zajedništva.

U našoj džamiji klanjat će se svi namazi, kao i ramazanski teravih-namaz. To je prilika da svoje duhovno zdravlje popravimo i posvjedočimo, ako to već nismo, zajedništvu i spokoju koji ramazan nosi sa sobom.



Tradicionalno učenje i slušanje Kur'ana, poznato kao *Mukabela*, održavat će se svaki dan u 11:30, počevši od 19. februara. Učeći džuz Kur'ana (20 stranica) svaki dan, na kraju mjeseca ramazana kompletirat ćemo učenje Kur'ana (hatmu). Nakon svake Mukabele, objasnit ćemo značenje i poruku proučenih kur'anskih dijelova.

Teravijah namaz će se klanjati 2 sata poslije akšamskog vremena i prema vremenu navedenom u *Vaktiji* koju možete naći na našim džematskim medijima ili u džamiji.

Zekat i sadekatul-fitr (vitre) možete uplatiti preko Swish-a (1 233 711 108) ili na džematski Bankgiro (255-2990). Prilikom uplate molimo vas da naznačite svrhu uplate, npr. "Zekat" i ime osobe.

Naš džemat i ove godine upriličit će dva džematska iftara, 21. i 22. februara. O načinu prijave bit ćete blagovremeno obavješteni putem društvenih mreža, poruka ili maila. Molimo sve članove koji nisu dostavili svoju mail adresu, da to učine prijavom na naš *nyhetsbrev*: <https://izgbg.se/>.

Radi sigurnosti sva vrata u lokalu se zaključavaju što će biti i uz ramazan. Ulaz je moguć sa brickom koju svi članovi mogu dobiti.

Vrata našeg džemata otvorena su svima koji žele doći i podijeliti ramazanske trenutke s nama.

Svi koji imaju potrebu komunicirati s nama mogu to uraditi putem telefona, maila ili messenger poruka.

Telefon: 0760362940, Mailadresa: goteborg@izb.se

Swish: 123 37 111 08 Bankgiro: 255–2990

Izvršni odbor Džemata Geteborg